

Ri na'ay carta ri xutz'ib'aj ri apóstol San Pablo chica ri hermanos ri ic'o Tesalónica

Jare' ri na'ay carta ri xutz'ib'aj ri apóstol Pablo chica ri hermanos ri ic'o pa tanamet Tesalónica. Antok jaja' xra'xaj chi ri hermanos mesque c'o problemas ri niq'ik'asaj, man rub'anun ta ca'ye' quic'u'x, rumare' xutak ri na'ay carta chica. Chupan ri carta, ri Pablo nu'ej chi áltira niq'icuot y ruyo'n tiox b'a' cha ri Dios cuma ijeje', ruma xra'xaj chi man quiyo'n ta can ri ruc'utun can chiquivach. Y nu'ej je' chica chi tiq'itija' quik'ij chupan ri c'ac'ac' c'aslien ri xuya' ri Dios chica.

Ri capítulo 1:1–3:13, ri Pablo nu'ej chi niq'icuot ránima y ruyo'n tiox b'a' cha ri Dios cuma ri hermanos re' chi quic'uan jun c'aslien otz. Y nu'ej je' chica chi áltira nca'nataj cha y c'o ru-deseo chi nib'aka chic jun b'ay quiq'uin.

Ri capítulo 4:1-12 nu'ej chica chi tiq'itija' quik'ij chi nca'q'uiy riq'uin ri quic'aslien, y tiq'ic'uaj jun c'aslien ri nika choch ri Dios.

Ri capítulo 4:13–5:11, ri Pablo nu'ej chiquivach ri hermanos ri chica rub'anic antok xtitzalaj chic pa jun b'ay ri Kajaf Jesucristo. Nu'ej chi ri i-quiminak chic el can xca'c'astaj, y ri c'a ic'as antok xtipa ri Ajaf Jesús, can xca'c'uax je' junan quiq'uin. Y nu'ej je' chica chi nic'atzin chi niq'icukub'a' quic'u'x siempre, y tiq'itola-qui' chi nic'ujie' más quichuk'a' chupan ri c'ac'ac' c'aslien ri xuya' ri Dios chica.

Ri capítulo 5:12-24, ri Pablo nca'ru'on mandar ri hermanos riq'uin ri chica niq'ui'an chupan ri quic'aslien.

Y ri capítulo 5:25-28, ri Pablo nuya' más mandamientos chica y nuq'uis ri carta riq'uin jun bendición.

Ri saludo

1 ¹Inre' Pablo, ri Silvano y ri Timoteo, nakatak-el va carta va chiva ixre' ri iglesia ri c'o Tesalónica.^a Ixre' jo'c jun ib'anun riq'u'in ri Katata' Dios y ri Ajaf Jesucristo. Ja ta ri favor y ri paz ri nuya' ri Katata' Dios y ri Ajaf Jesucristo tic'ujie' riq'u'in ivánima.

Ri ejemplo ri niquiya' ri hermanos ri ic'o Tesalónica

²Ojre' siempre nquixkanataj pa tak ka-oraciones. Can siempre nakaya' tiox b'a' cha ri Katata' Dios ivuma ixre'. ³Siempre nquixkanataj choch ri Katata' Dios ruma ri samaj ri nti'an ixre' ruma icukub'an ic'u'x riq'u'in ri Jesucristo. Nalka pa kave' chi altíra nquixsamaj ruma ntivajo' ri Jesucristo. Y man chupunak ta ri esperanza iviq'u'in richin ri k'ij chi xtitzalaj chic pa ri Kajaf Jesucristo. ⁴Hermanos, ojre' kata'n chi ri Dios altíra nquixrajo', y kata'n je' chi ri Dios xixrucha' chi xixuoc richin jaja'. ⁵Ruma antok xkatzijujoj ri evangelio chiva, man kayuon ta ojre' xkatzijujoj. Xa ja ri Espíritu Santo ri xto'n kichin chi xkatzijujoj riq'u'in poder. Y ja ri Espíritu Santo ri xsamaj riq'u'in ivánima. Can xk'alajin chivach chi ri xkatzijujoj chiva can ketzij. Y ixre' xitz'at che'l ri kac'aslien kuc'uan, ruma nakajo' ri otz chiva.

⁶Y ixre' can xivuc'uaj jun c'aslien inche'l kac'aslien ojre' y inche'l ruc'aslien ri Ajaf Jesús. Ruma antok xinimaj ri ruch'ab'al ri Dios, can itziel xixtz'iet cuma ri vinak ri man quiniman ta ri ruch'ab'al ri Dios.^b Pero mesque ixre' xi'an sufrir, man xixb'isuon ta, ruma ja ri Espíritu Santo xu'on chiva chi xixquicuot. ⁷Ixre' xixuoc jun ejemplo chiquivach ri quiniman je' ri Jesucristo ri ic'o nic'aj chic tanamet ri ic'o chupan Macedonia y ri ic'o chupan Acaya je', ruma ijeje' xca'xaj chi ixre' xinimaj ri Jesucristo. ⁸Y man jo'c ta ri ic'o chupan Macedonia y Acaya caxan chi icukub'an ic'u'x riq'u'in ri Dios, xa nojiel lugar nitzijos-ve. Y ruma quire' nitzijos chivij, x'a rutzijoxic ri ruch'ab'al ri Ajaf Dios. Y man nic'atzin ta chi ojre' nku'e'n quire'. ⁹Ruma ijeje' mismo ri nca'e'n chi antok xojalka iviq'u'in, otz xoji'an recibir. Niqui'ej c'a chi xinimaj ri c'aslic Dios y man xiya' ta chic quik'ij ri ídolos. Ixre' xa nti'an ri nrajo' ri ketzij Dios. ¹⁰Y niquitzijujoj chi ivoyo'ien ri k'ij antok ri Jesucristo ri Ruc'ajuol ri Dios, xtipa chic jun b'ay chicaj. Ja ri Dios ri xpilisan-pa richin chiquicajol ri quiminaki', y jaja' ri xticalo kichin choch ri castigo ri xtipa.

Ri rusamaj ri Pablo quiq'u'in ri hermanos ri ic'o Tesalónica

2 ¹Hermanos, ixre' ja'al ivata'n chi altíra rakalien chi xojalka iviq'u'in y xkatzijujoj ri ruch'ab'al ri Dios chiva. ²Y ivata'n je' chi antok

^a 1:1 Hch. 17:1. ^b 1:6 Hch. 17:5-9.

maja' kojalka iviq'uin ixre', ojre' xkak'asaj yan sufrimientos y q'uui yan ri x'an chika chupan ri tanamet Filipos,^c pero ri x'an chika chire' man xu'on ta chika chi xkaxi'ij-ki', ruma ri Dios xuya' kachuk'a' chi xojalka iviq'uin ixre' chi xkatzijuoq chiva ri ru-evangelio, mesque itziel xojtz'iet je' pan itanamit ixre'.^d ³Y ri ruch'ab'al ri Dios ri xkatzijuoq chiva, can pa ruchojmil xkatzijuoq. Y man xka'an ta maña chiva. Y man xkatzijuoq ta ri ruch'ab'al ri Dios chiva, ruma c'o ta jun kax nakajo' chiva. ⁴Xkatzijuoq ri evangelio chiva, ruma ja ri Dios ri xyo'n ri samaj re' chika. Quire' xu'on ruma jaja' rata'n chi nakajo' naka'an ri nika choch jaja'. Y ruma jaja' ri xyo'n ri samaj re' chika, ojre' riq'uin nojziel kánima naka'an ri samaj re', ruma nakajo' naka'an ri nika choch ri Dios, mesque man nika ta chiquivach ri vinak. Y ja ri Dios ta'mayuon ri chica rub'anun ri kánima, xa otz o man otz ta, ⁵y jaja' rata'n chi antok xkatzijuoq ri ruch'ab'al chiva, man ruma ta nakajo' nakach'ec miera. Y ixre' je' ivata'n chi ojre' man xkacusaj ta utzulaj tak tzij chi xka'an ta maña chiva. ⁶Man xkajo' ta je' chi ixre' y nic'aj chic xiya' ta kak'ij ojre', mesque otz ta ruma oj ru-apóstoles ri Cristo. Pero man xka'an ta quire'. ⁷Ojre' xa altíra xixkajo', inche'l nu'on jun quitie' quiq'uin ri ral, can c'o quiq'uin, nca'rajo' y ja'al nca'riliq. ⁸Y quire' ri xka'an ojre' chiva ixre'. Can xixkajo'. Rumare' xkatzijuoq ri ru-evangelio ri Dios chiva. Y man jo'c ta re'. Ruma xa ta xc'atzin chi xojcon ruma xixkato', can xka'an ta. Ruma altíra nquixkajo'. ⁹Hermanos, ixre' ivata'n chi ojre' man jun b'ay c'o ta ri xkac'utuj chiva. Ojre' xojksamaj pak'ij chi chak'a' chi xkach'ec ri xc'atzin chika, ruma man xkajo' ta xkaya' jun aka'n chivij antok xojc'ujie' iviq'uin chi xkatzijuoq ri ru-evangelio ri Dios chiva.

¹⁰Ri Dios can rata'n y ixre' je' can ivata'n chi antok ojre' xojc'ujie' iviq'uin, ri kac'aslien can otz choch ri Dios. Can xkuc'ujun jun choj c'aslien chivach ixre' ri iniman ri Jesucristo. Can man jun kax itziel xlitaj pa kac'aslien. ¹¹Ixre' ivata'n chi xka'an iviq'uin inche'l nu'on jun tata'l chica ri ral'ual. Xixka'an consolar y xka'ej chiva chi man tiya' can, ni man timastaj ri Dios. ¹²Xka'ej chiva chi tivuc'ujun jun choj c'aslien, ruma quire' nic'atzin naka'an ojre' ri oj richin ri Dios. Ruma ri Dios xojrayuoq chi nkojuoc chupan ri ru-reino y ri ru-gloria.

¹³Ojre' siempre nakaya' tiox b'a' cha ri Dios ivuma ixre'. Ruma antok xkatzijuoq ri ruch'ab'al ri Dios chiva, can otz xi'an recibir. Y man xi'ej ta ka chi xa ruch'ab'al jun vinak, xa xi'ej chi ruch'ab'al ri Dios. Y can ketzij chi quire', y nu'on chiva ixre' ri iniman ri Jesucristo chi nic'axtaj ri ic'aslien. ¹⁴Hermanos, antok ixre' xi'an sufrir pa quik'a' ri ivanakil ruma iniman ri Jesucristo, junan x'an chiva inche'l x'an chica ri nuvanakil israelitas ri quiniman je' ri Jesucristo, ri ru-iglesia ri Dios ri ic'o pa tak

^c 2:2 Hch. 16:19-24. ^d 2:2 Hch. 17:1-9.

tanamet richin ri Judea. Ruma ijeje' can xqui'an je' sufrir pa quik'a' ri quivanakil israelitas, ruma quiniman ri Jesucristo.^e ¹⁵Y ja mismo ri israelitas re' ri xa'e'n chi tiquimisas ri Ajaf Jesús, y vacame xojcalasaj-pa ojre'.^f Can quire' xqui'an ri vinak israelitas ri xa'c'ujie' ojier can, ruma iq'uiy profetas ri xa'quiquimisas. Ri israelitas ri xa'c'ujie' ojier can y ri i-richin ri tiempo vacame, can i-junan. Man niq'ui'an ta ri nika choch ri Dios, y can itziel nca'quitz'at quinojuel ri vinak. ¹⁶Ruma antok ojre' xkajo' xkatzijuo'j ri ruch'ab'al ri Dios chica ri vinak ri man israelitas ta, chi nca'colotaj chupan ri qui-pecados, ri israelitas ri man quiniman ta ri Jesucristo xcajo' ta xojquik'at chi xkatzijuo'j. Quire' nca'jin riq'uin ri qui-pecados ri israelitas, rumare' ri Dios ya ruyo'n ri castigo pa quive'.

Ri Pablo nrajo' chic nca'b'arutz'ata' ri hermanos ri ic'o Tesalónica

¹⁷Hermanos, ojre' mesque c'a jub'a' oc tiempo kojiel-pa iviq'uin, nquixkac'uxlaj. Pero mesque man ojco ta pa iviq'uin, ri kánima c'o-pa iviq'uin; can nakajo' chi nkojalka chic jun b'ay iviq'uin. ¹⁸Y can xkatej kak'ij chi xoj'a ta iviq'uin; inre' Pablo q'uiy mul xinvajo' chi xoj'a ta, pero ri Satanás xuk'at chakavach. ¹⁹Ojre' can nakajo' nkojalka iviq'uin, ruma niq'uiquoc kánima chi ixre' iniman ri Jesucristo. Rumare' niq'uiquoc kánima kayo'ien ri k'ij antok xtipa ri Kajaf Jesucristo. Ruma chupan ri k'ij re', xtiq'uiquoc ri Jesucristo kiq'uin ojre' ivuma ixre', ruma c'o xc'atzin chi xkatzijuo'j ri ruch'ab'al ri Dios chiva. ²⁰Ivuma ixre', ojre' c'o kak'ij y niq'uiquoc kánima.

3 ¹Ruma alt'ra xixkajo', man xkacoch' ta chic chi nakajo' nakana'iej ri chica ib'anun. Rumare' xka'ej chi otz nkoj'ujie' can kayuon pa tanamet Atenas,^g ²y xkatak-el ri hermano Timoteo chi xixb'arutz'ata'. Jaja' jun je' ru-siervo ri Dios y nisamaj kiq'uin chi nutzijuo'j ri ru-evangelio ri Cristo. Y xkatak-el chi ni'ruya' más ivuchuk'a' y nu'on je' chiva chi más ticukub'a' ic'u'x riq'uin ri Jesucristo, ³chi quire' man jun chivach xtumali'j ruc'u'x chupan ri sufrimientos y nuya' ta can ri Jesucristo. Ruma ixre' ivata'n chi pa kac'aslien ojre' ri kaniman chic ri Jesucristo, can nic'atzin chi nakak'asaj q'uiy sufrimientos. ⁴Talka pan ive' chi antok xoj'ujie' iviq'uin, xka'ej chiva chi can nca'pa sufrimientos pa kac'aslien. Y can ivata'n otz chi inche'l xka'ej can chiva, can quire' xb'anataj. ⁵Y ruma man xincoch' ta chic chi nivajo' nina'iej ri chica ib'anun, rumare' xintak-el ri Timoteo iviq'uin, chi nuna'iej-pa ri chica ib'anun, xa c'a icukub'an ic'u'x riq'uin ri Jesucristo. Ruma xin'ej-ka chi ri diablo ya xu'on chiva chi xiya' can ri Jesucristo, y xa man jun xc'atzin ri samaj ri xka'an chicajol.

^e 2:14 Hch. 17:5. ^f 2:15 Hch. 9:23, 29; 13:45, 50; 14:2, 5, 19; 17:5, 13; 18:12.

^g 3:1 Hch. 17:15.

⁶Pero vacame xa niqicuot ri kánima ruma ya xkaxaj ri chica ib'anun. Ruma ya xtzalaj-pa ri Timoteo.^h Jaja' xalru'ej chika chi can icukub'an ic'u'x riq'uin ri Jesucristo, y ntivajo' je' ivi'. Xalru'ej je' chika chi ixre' c'a nkojinataj y can nkojivajo'. Y xalru'ej je' chi man jo'c ta ojre' ri nakarayij nquixkatz'at, xa quire' je' ntirayij ixre'. ⁷Y rumare' hermanos, ojre' can xojquicuot ruma xkaxaj chi ixre' icukub'an ic'u'x riq'uin ri Jesucristo. Y mesque ojc'o chupan ri sufrimiento y c'o nu'on falta chakavach, xojru'on consolar. ⁸Y ruma ixre' cof ixc'o riq'uin ri Ajaf Jesucristo, can xuya' jun c'ac'ac' kac'aslien xkana' antok xkaxaj re'. ⁹¿Chica ta modo naka'an chi nakaya' tiox b'a' cha ri Dios ivuma ixre'? Ruma xi'an chika chi niqicuot kánima choch ri Ka-Dios. ¹⁰Can pak'ij chi chak'a' nakac'utuj cha ri Dios chi xkojtiquir ta nakatz'at kavach iviq'uin. Chi quire' xtakac'ut más chivach ri ruch'ab'al ri Dios ri nic'atzin pan ic'aslien ixre' ri icukub'an ic'u'x riq'uin ri Jesucristo.

¹¹Rumare' nakajo' chi ri Katata' Dios y ri Kajaf Jesucristo xtu'on chika chi xkojtiquir xkub'aka iviq'uin. ¹²Ojre' can altíra nquixkajo'. Y quire' je' nakajo' chi más tivajo-ivi' ixre', y qui'ivajo' je' quinojiel ri nic'aj chic vinak ri man quiniman ta ri Jesucristo. Y nakajo' chi ri Ajaf xtu'on chiva chi más nti'an quire'. ¹³Chi quire' can ta ntiya' más ivuchuk'a' riq'uin ri Jesucristo, y can siempre sak nic'ujie' ri ic'aslien choch ri Katata' Dios, chi quire' man jun kax itziel nilitaj chivij antok ri Kajaf Jesucristo xtipa chic jun b'ay junan quiq'uin quinojiel ri santos ralc'ual.

Ja ri choj c'aslien ri nika choch ri Dios

4 ¹Hermanos, antok xojc'ujie' iviq'uin, xka'ej chiva ri chica c'aslien ri nika choch ri Dios, y jare' tib'ana'. Y vacame naka'ej y naka'an rogar chiva pa rub'e' ri Ajaf Jesús chi man timalij nti'an ri otz. Y man jo'c ta naka'an rogar chiva, xa naka'ej chiva chi tib'ana' más y más ri nika choch ri Dios. ²Ixre' can ja'al ivata'n ri instrucciones ri xka'ej chiva. Y xka'ej re' chiva, ruma quire' nu'ej ri Ajaf Jesús. ³Ri Dios nrajo' chi can sak tic'ujie' ri ic'aslien choch. Jaja' man nrajo' ta chi nti'an inche'l niqui'an ri vinak ri niqicanuj-qui' chi niqui'an pecado. ⁴Ixre' achia', tivatamaj quixc'ujie' otz quiq'uin ri ivaxjayil y qui'b'ana' respetar. ⁵Man ti'an inche'l niqui'an ri vinak ri man cata'n ta roch ri Dios. Ruma ijeje' xa ja ri nurayij ri qui-cuerpo ri niqui'an. ⁶Man taka'an maña cha jun hermano chi nkojc'ujie' riq'uin ri raxjayil. Ruma xa naka'an jun ch'o'j quire', ri Ajaf xtuya' ri castigo pa kave'. Jare' xka'ej chiva antok xojc'ujie' iviq'uin. ⁷Ri Dios man xojrayuoj ta chi nakuc'uaj jun tz'il c'aslien. Jaja' xojrayuoj chi nakuc'uaj jun c'aslien sak. ⁸Y xa c'o jun chicajol ri man nrajo' ta nu'on ri xka'ej chiva, man katzij ta ojre' o rutzij ta jun chic

^h 3:6 Hch. 18:5.

vinak ri man nrajo' ta nra'xaj. Xa ja ri ruch'ab'al ri Dios ri man nrajo' ta nra'xaj, ri Dios ri ruyo'n-pa ri Ru-Espíritu Santo chika.

⁹Pero ri Dios xuc'ut yan chivach ixre' hermanos chi tivajo-ivi', rumare' man chic nic'atzin ta chi nitz'ib'aj chiva, ¹⁰ruma ixre' altíra nqui'vajo' quinojuel ri hermanos ri ic'o nojuel lugar richin ri Macedonia. Pero naka'an rogar chiva chi más tib'ana' quire'. ¹¹Y man ti'an je' ch'u'j-ch'u'j, xa ticanuj ri nic'atzin chiva y quixsamaj inche'l xka'ej chiva antok xojc'ujie' iviq'uin. ¹²Chi quire' ri vinak ri man quiniman ta ri ruch'ab'al ri Jesucristo nquixqui'an respetar, y quire' man jun xtu'on falta chivach.

Antok ri Jesucristo xtipa chic jun b'ay

¹³Hermanos, ojre' nakajo' chi ixre' ntivatamaj ri chica xti'an chica ri xquinimaj-el ri Jesucristo ri ya xa'con-el, chi quire' man nquixb'isuon ta inche'l niqui'an ri vinak ri manak esperanza quiq'uin. ¹⁴Ruma ojre' ri nakanimaj chi ri Jesucristo xcon y xc'astaj-el, nakanimaj chi ri Dios quire' xtu'on quiq'uin ri ya xa'con-el ri xquinimaj-el ri Jesucristo antok xa'c'asie' ri choch-ulief. Ri Dios can xca'ruc'asuoj-el.

¹⁵Y re' naka'ej chiva ruma quire' xu'ej ri Ajaf, chi konojuel ri kaniman jaja' can xkojuc'uaax chicaj. Y xa ojre' c'a oje'as antok jaja' xtipa chic jun b'ay, man nku'a ta na'ay chiquivach ri i-quiminak chic el. ¹⁶Ruma ri Ajaf antok xtipa chicaj, cof xtich'o-pa, y jun arcángel xtich'o-pa, y xtik'ajan-pa ri ru-trompeta ri Dios. Y na'ay xca'c'astaj-pa ri quiminaki' ri xquinimaj-el ri Cristo. ¹⁷Y después ojre' ri c'a oje'as can, xkujic'-el chicaj junan quiq'uin ijeje', chupan ri mukul, chi xtakac'ulu' ri Ajaf. Y xkoj'ujie' riq'uin jaja' richin nojuel tiempo.ⁱ ¹⁸Rumare' tiya' ruchuk'a' ivánima chib'il-ivi' riq'uin ri tzij re'.

5 ¹Hermanos, man nic'atzin ta chi nakatz'ib'aj-el chiva ri chica tiempo y ri chica k'ij xtipa ri Jesucristo. ²Ruma ixre' ja'al ivata'n chi man jun ta'mayuon ri chica k'ij xtipa ri Ajaf. Ruma antok jaja' xtipa, can xtu'on inche'l nu'on jun alak'uon chak'a'; man jun ta'mayuon jampe' nalka.^j ³Y antok ri vinak xtiqui'ej chi vacame otz kab'anun ruma c'o paz, xa ja xtiquina', xtipa jun nem castigo pa quive'. Can xtiqui'an inche'l nu'on jun ixok antok ya nic'ujie' ruxulu'. Man xca'colotaj ta choch ri castigo. ⁴Pero ixre' hermanos man ixc'o ta chic pa k'aku'n. Y rumare' antok xtipa chic ri Jesucristo, chivach ixre' man xtalka ta inche'l nalka jun alak'uon. ⁵Ruma konojuel ojre' ri kaniman ri Jesucristo man oj richin ta chic ri k'aku'n, xa oj richin chic ri sakil. ⁶Rumare' man taka'an inche'l niqui'an ri nic'aj chic vinak ri man ic'o ta pa sakil. Ijeje' man niqui'an ta pensar otz ri niqui'an ruma xa nca'var. Pero ojre' kuc'asie' y ka'na' pensar otz ri naka'an. ⁷Ri nca'var, chak'a' nca'var, y ri nca'k'ab'ar, chak'a'

ⁱ 4:15-17 1Co. 15:51-52. ^j 5:2 Mt. 24:43; Lc. 12:39; 2P. 3:10.

nca'k'ab'ar. ⁸Pero ojre' ri oj richin ri sakil, ruma kaniman ri Jesucristo, ka'na' pensar otz ri chica naka'an. Can takacukub'a' kac'u'x riq'u'in ri Jesucristo y ca'kajo' quinojiel, chi quire' naka'an defender-ki' inche'l nu'on ri soldado ri nuya' jun ch'ich' choch ruc'u'x, y siempre kanimaj chi ya xojcolotaj chupan ri ka-pecado, chi quire' naka'an defender-ki' inche'l nu'on ri soldado ri nuya' jun casco pa rujaluon.^k ⁹Ruma ri Dios man xojrucha' ta chi nipa ri castigo pa kave'. Jaja' xojrucha' richin chi nikil ri salvación (colotajic) ruma nakanimaj ri Kajaf Jesucristo. ¹⁰Y ixre' ivata'n chi ri Jesucristo xcon kuma ojre'. Jaja' xcon chi xuya' ri c'aslien chika. Richin quire', vi xa c'a ojc'as vave' choch-ulief o xa nkucon, c'o kac'aslien riq'u'in jaja'. ¹¹Rumare' tiya' ruchuk'a' ri ivánima ixre' chib'il-ivi'. Y titola-ivi' richin chi nquixqu'uiy chupan ri ic'aslien inche'l ib'anun-pa.

Ri Pablo nu'ej chica ri hermanos ri chica nic'atzin chi niqui'an

¹²Hermanos, nakac'utuj favor chiva chi qui'b'ana' respetar ri nca'samaj chicajol pa rusamaj ri Dios, ruma ijeje' ri i-c'uayuon ivichin. Jare' ri samaj ri yo'n chica ruma ri Ajaf Dios. Y chi nquixquich'olij je'. ¹³Rumare' qui'b'ana' respetar y qui'ivajo' ruma ri samaj ri niqui'an. Y man jun ta ayoval chicajol.

¹⁴Hermanos, naka'an rogar chiva chi qui'ch'olij ri hermanos ri man nicajo' ta nca'samaj. Ti'ej chica chi ca'samaj. Y ri caca' quic'u'x quib'anun, tiya' ruchuk'a' cánima. Y ri manak quichuk'a' chupan ri quic'aslien riq'u'in ri Jesucristo, qui'ito' chi man ca'tzak can. Y tic'ujie' je' i-paciencia quiq'u'in quinojiel.

¹⁵Y xa ic'o ri nca'b'ano itziel chiva, man ti'an ruc'axiel chica. Xa titija' ik'ij nti'an ri otz chica quinojiel chicajol-ka ixre' ri iniman ri Jesucristo y chica ri man quiniman ta.

¹⁶Siempre quixquicuot. ¹⁷Siempre tib'ana' orar. ¹⁸Can tiya' tiox b'a' cha ri Dios antok otz ixc'o y antok man otz ta ixc'o je'. Ruma quire' nrajo' ri Dios chi nti'an ixre' ri iniman ri Jesucristo.

¹⁹Man tichup rusamaj ri Espíritu Santo. ²⁰Man itziel titz'at jun hermano ri nu'ej chicajol chi c'o ni'e'x cha ruma ri Dios. ²¹Xa tivaxaj nojiel ri nu'ej, chi quire' ntina'ie'j xa ketzij o xa man ketzij ta. Y ja ri otz tic'ama-ka riq'u'in ivánima. ²²Y nojiel ri man otz ta, man ti'an.

²³Y ri Dios ri niyo'n paz pa tak ivánima, xtu'on chiva chi siempre ntvuc'uaj jun c'aslien sak choch jaja'. Xtuchajij je' ri iv-espíritu, ri ivánima y ri i-cuerpo, chi quire' man jun kax itziel nilitaj chivij antok xtipa chic jun b'ay ri Kajaf Jesucristo. ²⁴Ri Dios can man jun b'ay xquixruya' can ruma jaja' ri xayuon ivichin, y jaja' can xtu'on iviq'u'in inche'l ri nu'ej.

^k 5:8 Is. 59:17.

Ri bendición y ri ruq'uisb'al saludos

²⁵Hermanos, tib'ana' orar pa ka-cuenta.

²⁶Tiya' jun saludo chica quinojuel ri hermanos y titz'ub'aj ichi' pa rub'e' ri Ajaf Dios.

²⁷Y pa rub'e' ri Ajaf ni'ej chiva, chi tib'ana' leer va carta va chiquivach quinojuel ri santos hermanos.

²⁸Ja ta ri ru-favor ri Kajaf Jesucristo tic'ujie' iviq'uin. Amén.